


KANTONALNA
PRIVREDNA
KOMORA TUZLA


BROJ 1-2/23,
januar-februar
2023. godine



KOMORSKI INFORMATOR



„MORAMO RASTERETITI
PRIVREDU I FISKALNIH I
PARAFISKALNIH NAMETA“



POSLOVNA OČEKIVANJA
PRIVREDNIKA TK



“PRIVREDA TK” U
BEOGRADU



IN MEMORIAM...
ENES RUŽNIĆ



Komorski informator

Uvod

Poštovani čitaoci!



Sajamske aktivnosti za 2023. godinu otvorili samo učešćem na 44. međunarodnom sajmu turizma u Beogradu. Spektakularno otvaranje, izuzetna organizacija, rekordan broj izlagača, zemalja iz kojih izlagači dolaze, posjetilaca, poslovnih susreta, veliko interesovanje medija, karakteristike su ovogodišnjeg Sajma. Zajednička postavka koju organizuje Kantonalna privredna komora Tuzla pod nazivom „Privreda TK“, sada je već stalni učesnik ove izuzetno kvalitetne i značajne sajamske manifestacije. A nama je značajno i vrijedno pomeno i to što smo među 350 izlagača iz 33 države bili jedina Privredna komora. Pored nas, Bosnu i Hercegovinu su na ovom Sajmu predstavljali još, svako na zasebnom izložbenom prostoru, turističke zajednice iz FBiH na jednom, Turistička organizacija RS na drugom i Nacionalni park „Una“ Bihac na trećem izložbenom prostoru. Na onom našem, četvrtom ili prvom iz BiH, kako god, zabilježili smo u sve sajamske dane izuzetno dobru posjetu, veliki broj susreta, sastanaka, novih kontakata, razgovora...

Sezonu sajmovi smo otvorili, pred nama su još brojne sajamske manifestacije u ovoj godini.

U Kantonalnoj privrednoj komori Tuzla bilježimo niz aktivnosti u periodu januar-februar 2023. godine, periodu koji obuhvata ovo izdanje Komorskog informatora.

Kantonalna privredna komora Tuzla i zvanično je ispunila sve potrebne uslove za neformalno obrazovanje odraslih.

Posjetile su nas Martha Suda komercijalna savjetnica u komercijalnom odjelu Austrijske ambasade u Bosni i Hercegovini i Viktoria Kuzmits koordinator u austrijskoj Agenciji za obrazovanje i internacionalizaciju OeAD-GmbH pri Regionalnom uredu za saradnju Sarajevo.

Profesori građevinsko – geodetske struke u srednjim školama sa područja Tuzlanskog kantona učestvovali su na tradicionalnom seminaru u organizaciji Pedagoškog zavoda Tuzlanskog kantona, održanom u Komori.

U okviru redovnih godišnjih aktivnosti Udruženja za trgovinu, ugostiteljstvo i turizam Kantonalne privredne komore Tuzla, održana je prva sjednica Odbora Udruženja u 2023. godini.

Održana je i prva ovogodišnja sjednica odbora Udruženja industrije tekstila, kože i obuće.

Donosimo i niz aktivnosti iz firmi naših članica, Grada Tuzla, Vlade TK...

Sve navedeno, palo je u sjenu u subotnje jutro 25. februara, kada nas je nakon kratke i teške bolesti, u 60. godini napustio naš prijatelj, prijatelj naše komore, vrijedni i dobri komorski radnik, Enes Ružnić predsjednik Privredne komore USK...

Dino Kalesić
gl. i odg. urednik



Komorski informator

Sadržaj

KANTONALNA PRIVREDNA KOMORA TUZLA

KOMORSKI INFORMATOR BROJ 1-2/23, januar-februar 2023. godine

IZDAVAČKI SAVJET:

1. Nedret Kikanović, član
2. Elvir Salihović, član
3. Izet Džananović, član
4. Suad Selimović, član
5. Edina Kurtić, član

REDAKCIJSKI KOLEGIJ:

1. Nedret Kikanović, član
2. Almir Mešić, član
3. Edina Kurtić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:

Dino Kalesić

TEHNIČKA PRIPREMA, REPRO I ŠTAMPA:

GRIN d.o.o. Gračanica

ZA ŠTAMPARIJU:

Hariz Altumbabić, direktor

TIRAŽ:

500 primjeraka.

ADRESA:

Trg slobode bb
e-mail: kpktz.ba@bih.net.ba
<http://www.kpktz.ba>

	„Moramo rasteretiti privredu i fiskalnih i parafiskalnih nameta“	4, 5 i 6
	Poslovna očekivanja privrednika Tuzlanskog kantona	7
	Komora "Organizator obrazovanja odraslih"	8
	Razgovori vezani za oblast obrazovanja	8
	Podrška promociji „Privrede TK“ na sajamskim manifestacijama	9
	Primjena Zakona o izmjeni zakona o doprinosima	10
	Zakon o kontroli duhana u FBiH stupa na snagu 20. maja	11
	“Privreda TK” u Beogradu	12
	Najava sajamskih manifestacija	13, 14 i 15
	Iz firmi članica Komore	16 i 17
	Iz Gradske uprave Tuzla	18 i 19
	Iz Vlade TK	20
	Usavršavanje za NO i UO, prijave za novu grupu	21
	IN MEMORIAM... Enes Ružnić	23



Predsjednik Kikanović za emisiju "U fokusu" RTVTK...

„Moramo rasteretiti privredu i fiskalnih i parafiskalnih nameta“

Prezentiramo privredu Tuzlanskog kantona na međunarodnim sajmovima na kojima učestvujemo, kao Kantonalna privredna komora Tuzla sa zajedničkom postavkom "Privreda TK"



Razgovarala: Devleta Brkić

Prelazak iz 2022. u 2023. godinu prilika je za razgovor o tome kako će se protekla godina pamtiti u Kantonalnoj privrednoj komori Tuzla. O tome šta je urađeno u prošloj godini, kakvi su planovi za 2023. godinu za emisiju "U fokusu" RTVTK govorio je Nedret Kikanović predsjednik Kantonalne privredne komore Tuzla.

Prije sumiranja 2022. godine i razgovora o planovima za 2023. godinu, da se dotaknemo aktuelne teme, ulaska hrvatske u schengenski prostor od 1.1.2023. godine. Koji su to izazovi sa kojima će se suočiti bosanskohercegovački prijevoznici na granici sa Hrvatskom?

"Prije svega, rekao bih da će se od ulaska Hrvatske u schengenski prostor sa izazovima suočiti ne samo prijevoznici nego i bh izvoznici, izvoznici sa Tuzlanskog kantona. Nešto značajnije se neće promijeniti. Postupak je isti, s tim da će za prijevoznike sigurno biti sljedeća situacija: broj dana koji mogu provesti u schengenskoj zoni je ograničen. To je 60 dana u okviru 180 dana. Moramo uzeti u obzir da će se duže zadržavati u toj zoni i to će biti sigurno opterećenje za naše prijevoznike u smislu da će broj dana koji oni provedu tamo, odnosno, mogućnost da provedu duže biće sužena. Druga stvar, kod naših izvoznika potreba za fitosanitarnim pregledom će biti ista, nažalost, schengenska pravila su takva i Hrvatska to poštuje, njihovi fitosanitarni inspektori rade do 15,00 sati. Naši rade do 19,00 sati i tu se javlja problem kod izvoza roba koje su kvarljive, voće, povrće, sve što se izvozi u hladnjačama. Mi smo već poduzeli određene mjere, u smislu da smo podnijeli zahtjev Ministarstvu vanjske trgovine i ekonomskih odnosa BiH gdje tražimo da podnesu zahtjev za otvaranje dva nova granična prijelaza u RH, to je prije svaga Orašje i Svilaj da bi

naši izvoznici mogli imati olakšan izvoz i veći protok roba, da se manje zadržavaju na granici".

Koja je moguća direktna šteta za bh prijevoznike, šta je to što se potencijalno može dogoditi?

"Potencijalno se može dogoditi da ako se nastavi ovim trendom, ako ne riješimo problem sa fitosanitarnim pregledom, dugo će stajati u redovima, dugo će boraviti u schengenskoj zoni, imaće manji broj odlazaka u Evropu".

Kako pomoći našim izvoznicima, našoj privredi, u konkretnoj situaciji u kojoj problem sa fitosanitarnim pregledom robe koja se izvozi na tržište EU, traje već duže vrijeme?

"Traje već tri-četiri godine, duže već pokušavamo to riješiti. Mislim da će se ulaskom Hrvatske u schengensku zonu i hrvatske inspekcije rasteretiti, da neće imati ono što su imali do sada prema Mađarskoj i Sloveniji i da će moći da se pokusiraju na granicu sa trećim zemljama tj. sa Bosnom i Hercegovinom i tu će imati prostora, dovoljno ljudi da otvore ta dva granična prijelaza. Ono što želim istaći kada je pitanja kako olakšati izvoznicima, jeste da moramo stimulisati izvoz, dati određene benefite našim izvoznicima i to je ono što mi moramo uraditi u narednom periodu da bi povećali izvoz i da bi naši proizvođači bili konkurentni na evropskom tržištu".

Kada već pominjemo tržište EU, u Kantonalnoj privrednoj komori Tuzla je nedavno održana prezentacija kompanija i privrede Tuzlanskog kantona na tržištu EU, radi se o predstavljanju privrede BiH na tržištu Njemačke, Švicarske i Austrije, tržištu od 100 miliona stanovnika. Koliko su značajne, ova, i slične prezentacije?

"Sve prezentacije privrede, posebno Tuzlanskog kantona su za nas jako značajne pa tako i pomenuta. Mi puno toga radimo,



prezentiramo privredu Tuzlanskog kantona na međunarodnim sajmovima na kojima učestvujemo, kao Kantonalna privredna komora Tuzla sa zajedničkom postavkom "Privreda TK" i to je jako bitno. U 2023. godini ćemo raditi "Tuzlanski kanton - vaš poslovni partner", to je jedna biznis publikacija i to će biti jedna stvar gdje ćemo mi na tržištu EU putem Komorskog sistema u okviru Eurochambera raditi promociju privrede Tuzlanskog kantona. To je projekat koji planiramo raditi u 2023. godini koji smatramo veoma značajnim za promociju i prezentaciju privrede Tuzlanskog kantona".

Često se govori o tome da se radnicima u BiH povećaju plate. Šta je urađeno u posljednje vrijeme kako bi se riješili problemi koje imaju poslodavci što bi im ujedno i olakšalo poslovanje?

"Moram reći da su privrednici ove godine povećali plate. Imamo već povećanje plata na Tuzlanskom kantonu u odnosu na isti period prošle godine za 16% i to govori da je privreda uradila ono što je mogla, privrednici su uradili koliko su mogli. Ono što je sada fokus, to je da moramo rasteretiti privredu i fiskalnih i parafiskalnih nameta kako bi dali prostora da se povećaju plate. To je nešto na čemu u budućnosti treba da insistiramo. Moram reći da niz godina mi imamo te zahtjeve, urađene određene analize i projekcije šta bi se to sve desilo kada bi se smanjili ti fiskalni i parafiskalni nameti. Mislim da je krajnje vrijeme, da je došao taj trenutak da se to mora uraditi ako želimo dobrobit ovom društvu, ovoj zajednici i privrednom okruženju i da naša privreda bude konkurentna na evropskom i svjetskom tržištu".

Pojavila se informacija da je Vlada FBiH dala prijedlog da najniža plata od 1.1.2023. godine bude 596KM a trenutno iznosi 543KM, kako to komentarišete?

"To je sigurno nešto na čemu se treba raditi i ja tvrdim da te plate u narednom periodu moraju biti puno veće i da će biti prostora, ali samo pod uvjetom da Vlada rastereti privredu FBiH fiskalnih i parafiskalnih nameta. Onda ćemo imat puno veću minimalnu platu nego sada a svima je cilj da bolje živimo i više zarađujemo".

Zvanični podaci za sedam mjeseci 2022. godine, pokazuju da su u BiH pa i u TK rasli i izvoz i uvoz. Šta pokazuju vaši zvanični podaci, šta je to što smo najviše izvezli u ovoj godini?

"Za prvih devet mjeseci privreda Tuzlanskog kantona je izvezla 2 milijarde i 38 miliona KM, što je za nepunih 39% više u odnosu na isti period prošle godine. To je značajan pomak. Moramo reći i da je inflacija bila 16%. Moramo reći da smo najveći izvoz imali u hemijskoj, elektro, metalnoj, drvenoj i auto industriji te jedan dio u tekstilnoj industriji. To su proizvodi koje smo plasirali na tržište EU. Naši partneri su Austrija, Njemačka, Italija, kao najznačajniji. Moramo reći da je privreda TK najveći izvoznik u FBiH. Moramo reći da je pokrivenosti uvoza izvozom 89% na Tuzlanskom kantonu. Imamo spoljnotrgovinski deficit od oko 200 miliona KM. To su zvanični podaci i to je nešto što govori o mogućnostima i perspektivi privrede Tuzlanskog kantona. To su proizvodi hemijske, metalne, drvne industrije gdje smo mi lideri u proizvodnji".

Tuzlanskom kantonu i cijeloj BiH nedostaje radne snage. Koja su to najtraženija zanimanja i šta se čini po tom pitanju?

"Mi u Tuzlanskom kantonu imamo oko 103.000 zaposlenih po podacima Porezne uprave. Imamo 68.000 nezaposlenih od kojih je 65% stručne radne snage i 35% nestručne radne snage. To su podaci koji govore da u Tuzlanskom kantonu ima prostora da se ljudi zaposle. Imamo nedostatak radne snage u svim industrijskim granama. Kad počnemo od hemijske, metalne, drvne, tekstilne itd. Sve te grane traže stručne ljude za obavljanje određenih poslova. To je ono što moramo raditi u neformalnom obrazovanju. Da ljude s biroa, sa evidencije pozovemo, da ih obučimo, damo im određene vještine i znanja da bi mogli raditi određene poslove. Problem je što na birou imamo puno ljudi koji su završili srednje škole zanimanja koja se ne traže. Te stvari moramo uraditi da bi uposlili takve kadrove. Sigurno je da se svugdje u svijetu osjeća nedostatak radne snage pa i kod nas i to je globalni problem, treba se posebno boriti da naši ljudi ne odlaze na druga tržišta da rade".



Koje su to aktivnosti Kantonalne privredne komore Tuzla koje se provode krajem 2022. i početkom 2023. godine?

“Mi smo krajem godine održali sjednice Skupštine i UO Komore. Usvojili smo Program rada za 2023. godinu, Finansijski plan za 2023. godinu. Pripremamo se za narednu godinu i to su posljednje aktivnosti u 2022. godini u kojoj smo puno toga radili na promociji i prezentaciji privrede TK. Radili smo to putem sajamova, našeg web sajta, Komorskog informatora, Privrednog servisa, LED displeja, to su sve stvari koje radili na promociji i prezentaciji privrede TK. Održali smo niz javnih rasprava vezano za zakone i nacрте zakona. Radimo puno na edukacijama, od polaganja pravosudnog ispita, seminara za upravne i nadzorne odbore, edukacija vezano za digitalni marketing, sajber kriminal edukacija koju smo radili u saradnji sa predstavnicima MUP TK. To su neke stvari koje smo radili u 2022. godini”.



Šta biste izdvojili, posebno upečatljivo po čemu ćete pamtili 2022. godinu?

“U Kantonalnoj privrednoj komori Tuzla 2022. godinu ćemo prevashodno pamtili po tome što smo po izlasku iz pandemije i ove “Ukrajinske krize”, počeli da radimo konkretnije i ozbiljnije na promociji i prezentaciji privrede TK u regionu. Mislim da su to stvari koje su bile upečatljive za ovu godinu i da je to nešto što je sigurno dalo određene rezultate i već se pripremamo za ovu godinu. U fazi smo potpisivanja ugovora sa Zagrebačkim velesajmom i sajmom “Grand Expo” da budemo partneri u tim velikim međunarodnim sajmovima gdje će U Kantonalna privredna komora Tuzla vršiti prezentaciju privrede Tuzlanskog kantona i Bosne i Hercegovine”.

Pomenuli ste sajmove, ono što svakako Kantonalna privredna komora Tuzla omogućava svojim članicama jeste učešće na različitim sajmovima. Šta je to što nam u tom smislu predstoji u narednom periodu?

“U programu rada za 2023. godinu smo usvojili niz sajмова koje ćemo raditi i to je veći broj u odnosu na ranije godine i doista zahtjeve i potrebe privrede Tuzlanskog kantona na tim sajmovima, što regionalnim što evropskih što sajмова u Bosni i Hercegovini. Mislim da ćemo u tom smjeru ići puno efikasnije nego ranijih godina”.

Kakva je saradnja sa drugim privrednim komorama kako u Bosni i Hercegovini tako i van granica naše zemlje?

Kantonalna privredna komora Tuzla je jedan od značajnijih partnera u Komorskom sistemu Bosne i Hercegovine, prije svega što smo Komora sa velikim brojem članica, respektabilnih članica i Komorskom sistemu BiH smo među najboljim kantonalnim komorama. I u regionu smo prepoznati kao partneri za niz projekata i u edukaciji i u predstavljanju

privrede Tuzlanskog kantona”.

Kantonalna privredna komora Tuzla vrlo često organizira različite vrste edukacija. Koje biste najznačajnije edukacije izdvojili u 2022. godini?


“Mi smo 2022. godinu ispratili seminarom o Pravosudnom ispitu koji je u toku i koji će se nastaviti i u 2023. godini. Prije toga, završili smo seminar za članove upravnih i nadzornih odbora, radili smo seminar o javnim nabavkama, edukacije za digitalni marketing i sajber kriminal, radili smo puno značajnih edukacija, osjetila se potreba za takvim stvarima”.

Koliko je generalno interesovanje za te vrste edukacija?

“Moramo reći da sve više ljudi prepoznaju potrebu za tim, iz prostog razloga. Tržište, sam način komunikacije, traži da se ljudi što više specijalizuju i edukuju u određenim sferama koje su bitne za privredu Tuzlanskog kantona. Mi smo za narednu godinu pripremili niz edukacije koje ćemo raditi tokom godine, mislimo da će to biti interesantno, posebno, radićemo jedan dio zajednički sa Gradom Tuzla, Zavodom za zapošljavanje TK. Riječ je o edukaciji, neformalnom obrazovanju ljudi koje ćemo osposobiti za određena zanimanja u određenom periodu naredne godine što će sigurno biti interesantno za privredu Tuzlanskog kantona”.

Usvojili ste Plan rada za 2023. godinu. Koji su to, u kratkim crtama, najznačajniji planovi?

“Za ovu godinu pripremamo neformalno obrazovanje odraslih osoba i stručnu praksu u srednjim školama. To radimo sa njemačkom organizacijom GIZ. Želimo da u ovoj godinu radimo na tom polju, da bi upravo postigli taj dio, kada govorimo o ljudima nezaposlenim koji su na Birou, da bi mogli izvršiti određene njihove edukacije, osposobljavanje, da mogu da rade u nekim firmama na održanim zanimanjima, da dobiju taj posao. To je nešto što će biti fokus a to je cilj prije svega i da omogućimo privredi da dođu do kvalitetnih i brzo osposobljenih ljudi za određene poslove”.



Za kraj, da nam kažete, koliko je važno zajedničko djelovanje privrednika kroz komorska udruženja?

“Trenutno je u Komori 13 udruženja a tokom godine ćemo raditi, shodno novoj organizaciji u Komori, radićemo na određenim spajanjima i formiranju novih udruženja iz interesa i potrebe privreda koja se pokazala, i upravo oni kroz ta svoja udruženja iskazuju svoje potrebe, svoje zahtjeve i pokazuju ono što bi trebalo da se unaprijedi i da imamo što bolje privredno okruženje”.

Razgovarala: Devleta Brkić
rtvtk.ba




POSLOVNA OČEKIVANJA PRIVREDNIKA TUZLANSKOG KANTONA

Kao i prethodnih godina, u januaru 2023. godine urađeno je anketiranje privrednika Tuzlanskog kantona o uslovima poslovanja u 2022. i očekivanjima u 2023. godini. Na pitanje da ocijene opće stanje poslovanja u 2022. godini, 50% ispitanika je ocijenilo prosječnim (ocjena 3 u rasponu ocijena od 1 do 5). Kao najveći problem identificiran je nedostatak radne snage. U 2022. godini čak 81,5% ispitanika suočilo se sa problemom pronalaska radnika. Osim nedostatka radne snage, najistaknutiji problemi su fiskalna i parafiskalna opterećenja koja onemogućuju povećanje plata radnicima te rast troškova (energenti, transport, sirovine, repromaterijal) usljed općeg rasta cijena.


Faktori koji su izrazito negativno uticali na poslovanje su: energenti i gorivo, cijene sirovina, repromaterijala i transportni troškovi, nedostatak radne snage, fiskalni i parafiskalni nameti i korupcija. Kao neutralne privrednici su istakli pristup finansijama, pravosuđe i sigurnost, naplatu potraživanja i javnu upravu i administraciju. Obzirom na globalne ekonomske poremećaje, privrednici su ocjenjivali eventualne gubitke koje su imali u poslovanju. Njih 50% je izjavilo da nisu imali gubitke uzrokovane globalnim poremećajima, dok ih je 16,7% izjavilo da su imali štete preko 250.000 KM.

Možete li procijeniti gubitke koje ste imali u 2022. godini, a uzrokovani su globalnim ekonomskim poremećajima?



74% učesnika je izjavilo da nisu smanjivali broj zaposlenih u prethodnoj godini, 16,7% je zaposlilo nove radnike, dok je 9,3% firmi moralo smanjiti broj zaposlenih usljed rasta troškova poslovanja.


Da li ste u 2022. godini izgubili nekog od ključnih kupaca ili tržišta?



Nedostatak radne snage je prisutan u svim djelatnostima, a najveće potrebe su za radnicima raznih profila mašinske i elektro stuke, radnici u tekstilu, građevinarstvu, proizvodnji namještaja, hemijskoj industriji, ugostiteljstvu i radnici za jednostavne poslove za rad u fabrikama. Na pitanje da li su koristili uvoznu radnu snagu, 91% firmi je izjavio da nije, ali njih 6% planira u 2023. godini svoje potrebe za radnicima zadovoljiti uvoznom radnom snagom.

Kada su u pitanju poslovna očekivanja u 2023. godini, 42,6% je izjavilo da očekuju pogoršanje uslova poslovanja, ali i uprkos tome, 59,3% planira investicije u tekućoj godini.

Kakva su Vaša očekivanja za 2023. godinu?



Na kraju, privrednici su identificirali mjere koje bi im najviše pomogle u poslovanju u narednom periodu:

1. Smanjenje poreza i doprinosa da bi se stvorio prostor za povećanje plaća radnicima
2. Stimulacija izvoza
3. Subvencije za investicije
4. Niže cijene energenata
5. Pojednostavljene procedure zapošljavanja stranaca i sezonskih radnika



Iz Kantonalne privredne komore Tuzla...

Komora "Organizator obrazovanja odraslih"

Zvanično ispunjeni svi potrebni uslovi



Kantonalna privredna komora Tuzla i zvanično je ispunila sve potrebne uslove za neformalno obrazovanje odraslih. Ministarstvo za obrazovanje i nauku Tuzlanskog kantona utvrdilo je to izdavanjem "Rješenja o ispunjenosti uslova za rad organizatora obrazovanja odraslih". Nakon što je pomenuto kantonalno ministarstvo provelo sve potrebne aktivnosti, formiralo Komisiju, obavilo uvide i provjere a u skladu sa potrebnim pravilnicima i zakonima, odobren je zahtjev Komore i od januara 2023. godine i zvanično je Komori dodjeljeno Rješenje za neformalno obrazovanje odraslih. Kantonalna privredna komora Tuzla je u prethodnom periodu obavila

niz značajnih aktivnosti i kontakata sa svojim članicama, privrednicima Tuzlanskog kantona u cilju dobijanja informacija o aktuelnoj problematici poslovanja. U najvećoj mjeri, rezultati tih aktivnosti su ukazivali na nedostatak kvalifikovane radne snage kao najveći problem privrede, na globalnom planu, pa tako i na području Tuzlanskog kantona. Upravo s ciljem prevazilaženja ovog problema, pokušaja da se pokrenu aktivnosti na obezbjeđenju što kvalitetnijeg i stručnog kadra za privredne subjekte, pokrenute su u Komori aktivnosti na neformalnom obrazovanju. Kao Organizator obrazovanja odraslih Komora planira u narednom periodu aktivno raditi na edukaciji i osposobljavanju radne snage za potrebe firmi članica Komore i privrede Tuzlanskog kantona. Značaj ovog koraka je veći ako se ima u vidu i trend odlaska mladih iz Bosne i Hercegovine, upravo u potrazi za kvalitetnijim, profitabilnijim poslovima i boljim uslovima rada i života. U cilju zaustavljanja ovog trenda, od velike važnosti može biti neformalno obrazovanje koje se bazira na sticanju konkretnih vještina i znanja kroz teoriju i praktičan rad a vezano za konkretne poslove i vještine, koje i mladima kao potencijalnim radnicima i aktuelno sposobnim kadrovima, u značajnoj mjeri podiže konkurentnost na tržištu rada.

Razgovori vezani za oblast obrazovanja

Austrijska ambasada i austrijska Agencija za obrazovanje i internacionalizaciju

Kantonalnu privrednu komoru Tuzla posjetile su Martha Suda komercijalna savjetnica u komercijalnom odjelu Austrijske ambasade u Bosni i Hercegovini i Viktoria Kuzmits koordinator u austrijskoj Agenciji za obrazovanje i internacionalizaciju OeAD-GmbH pri Regionalnom uredu za saradnju Sarajevo. U okviru planiranih aktivnosti na području Tuzlanskog kantona, posjetile su Tuzlu i Komoru kako bi prenijele dio svojih aktivnosti, dobrih praksi i iskustava iz Austrije a vezanih za oblast obrazovanja. Sa Nedretom Kikanovićem predsjednikom Kantonalne privredne komore Tuzla i njegovim saradnicima, razgovarano je o enegretnim potencijalima i budućim pravcima razvoja, o obnovljivim izvorima energije, saradnji firmi iz autoindustrije te o mogućnostima saradnje i poslovnog povezivanja firmi iz Austrije i firmi sa područja Tuzlanskog kantona. Predsjednik Kikanović je, ističući značaj austrijskih stranih ulaganja u Bosni i Hercegovini, istakao značaj investicije u Lukavac cement kao jedan od najsvjetlijih primjera saradnje i uspješne austrijske investicije na području Tuzlanskog kantona. Susret u Komori bio je prilika i za predstavljanje rada i aktivnosti Komore te strukture privrede TK. Istaknut je i izvozni značaj kao i značaj prisustva kompanija sa područja TK na tržištima EU. Kada su u pitanju projekti na kojima se baziraju aktivnosti Regionalnog ureda OeAD u Sarajevu, istaknuti su "Poboljšanje kvalitete i relevantnosti stručnog obrazovanja u BiH u periodu od 2021. do 2030. u skladu sa preporukama iz Rige, Djelotvoran razvoj kvalitete u stručnim školama pomoću uspješnog upravljanja promjenama sa akcentom na jačanje kompetencija direktora i direktorica škola, Saradnja škole i privrede u području turizma, Osiguravanje kvalitete pri provedbi nastave poduzeća za vježbu, Podrška u izradi nove

strategije za srednje stručno obrazovanje u BiH, Podrška nastave Preduzeće za vježbu u Bosni i Hercegovini. Aktivnosti i projekte su pratili priručnici koje je realizovao Ureda pa se u tom segmentu ističu "Youth Start" priručnik za sve učenike/ce u Bosni i Hercegovini koji podržava mlade poduzetnike/ce pri razvoju njihovih vlastitih poslovnih ideja te Priručnik za nove direktore/ice koji je savjetnik i pratilac novih direktora/ica, onih koji prvi put stupaju na tu funkciju. Kako su istakle gošće na sastanku u Komori, Regionalni ured OeAD-a u Sarajevu provodi obrazovne projekte u bliskoj saradnji sa Ministarstvom civilnih poslova, entitetskim ministarstvima obrazovanja, svim kantonalnim ministarstvima obrazovanja u BiH i Agencijom za predškolsko, osnovno i srednje obrazovanje. Saradnja u okviru obrazovnih projekata se fokusira na reformu stručnog obrazovanja, upravljanje obrazovanjem i kvalitetom u školama i poboljšanje saradnje između privrede i stručnog obrazovanja.



D.K.



Iz Udruženja za trgovinu, ugostiteljstvo i turizam...

Podrška promociji „Privrede TK“ na sajamskim manifestacijama

Zahvalnost Komori na obezbjeđenju izložbenog prostora na brojnim, velikim i značajnim sajamskim manifestacijama



U okviru redovnih godišnjih aktivnosti Udruženja za trgovinu, ugostiteljstvo i turizam Kantonalne privredne komore Tuzla, održana je prva sjednica Odbora Udruženja u 2023. godini. Okupljeni članovi ovog komorskog Udruženja sa predstavnicima svih grupacija, stava su da u odborima, Udruženja i grupacija, i u narednom periodu trebaju ostati isti predstavnici, predsjednici odbora sa svojim zamjenicima. Također, zaključeno je da je u narednom periodu neophodno raditi na animiranju privrednika, predstavnika firmi članica Udruženja, na aktivnijem učešću u radu odbora i svim ostalim aktivnostima koje se poduzimaju u okviru planiranog i usvojenog Programa rada za 2023. godinu. Na sastanku u Komori nije bilo novih dopuna i izmjena već usvojenog Plana i programa rada Udruženja za trgovinu, ugostiteljstvo i turizam Kantonalne privredne komore Tuzla za 2023. godinu. Značajna je rasprava bila vezana za sajamske nastupe. Uz isticanje zahvalnosti Komori na obezbjeđenju izložbenog prostora na brojnim, velikim i značajnim sajamskim manifestacijama a što je i direktna ušteda firmama članicama koje su u svom planu rada imaju sajamske promocije, dogovoreno je i aktivnije učešće i predstavljanje na sajmovima koji predstoje. Tako se u prvi plan stavlja izuzetno značajan, jedan od najkvalitetnijih sajмова u ovom dijelu Evrope a iz oblasti turizma. Riječ je o 44. sajmu turizma koji se u Beogradu tadicionalno održava u februaru. Za ovaj sajam, na kojem je Komora obezbijedila izložbeni prostor potpuno besplatno za svoje članice zahvaljujući izuzetno kvalitetnoj saradnji sa menadžerima Beogradskog sajma, vlada veliko interesovanje. Posebno zbog činjenice da je u prethodnih nekoliko godina ostvareno niz kontakata upravo na ovom sajmu, na prostoru koji Komora organizuje kao "Privredu TK" a koji su rezultirali izuzetno kvalitetnom poslovnom saradnjom koja još uvijek traje. Sajam u Beogradu će biti prilika da se ta sradnja učvrsti, proširi i da se ostvare novi kontakti na koje računaju članice Komore iz oblasti turizma. Očekuje se i da se turističke agencije i zajednice, članice Komore, upravo počev od ovog sajma u Beogradu, aktivnije uključe u promociju turističkih destinacija i potencijala sa područja Tuzle i Tuzlanskog kantona, da se intenzivnije i kvalitetnije posvete segmentu tzv. "incoming turizmu" te da se u narednom periodu, uz pomoć i saradnju relevantnih gradskih i kantonalnih institucija, strateški pristupi razvoju domaćeg turizma kako bi ova industrijska grana bilježila značajnije rezultate.



Ukazano je na potrebu proširenja tržišta na kojem se mogu ponuditi i predstaviti domaće turističke destinacije pa je tako, uz još jednu pohvalu tradicije nastupa na sajmu u Beogradu, pohvaljen napor Komore u obezbjeđenju još jednog prostora za promociju domaće turističke ponude u kojoj je novitet kompleks "Muška voda" Kladanj. Riječ je o 31. sajmu turizma, hotelijerstva, ugostiteljstva i 48. sajmu hrane koji će se u Budvi održati od 29.3. do 1.4. a na kojem je, za potrebe svojih članica, Komora obezbijedila izložbeni prostor.

Pripremio: Dino Kalesić



Iz Udruženja industrije tekstila, kože i obuće...

Primjena Zakona o izmjeni zakona o doprinosima

Sjednica Odbora u proširenom sazivu



U februaru je održana prva ovogodišnja sjednica odbora Udruženja industrije tekstila, kože i obuće Kantonalne privrede komore Tuzla u proširenom sazivu na kojem je razmatrana aktuelna problematika iz ove industrije. Gost sastanka je bio Ismet Kalić direktor firme FinConsult doo Tuzla. Članovi Odbora ovog komorskog Udruženja, direktor Kalić je razjasnio nejasnoće koje se odnose na primjenu Zakona o izmjeni zakona o doprinosima koji je stupio na snagu 28.1.2023. godine (Sl.novine FBiH 6/23), a koji propisuje način obračuna doprinosa za industriju tekstila, kože i obuće po povlaštenoj osnovici. Osim toga razmatrani su i Odluka o iznosu najniže plaće u FBiH i novi Kolektivni ugovor za djelatnost tekstilne, kožarsko-prerađivačke, gumarske i industrije obuće u FBiH, a koji se primjenjuje od

1.1.2023. godine. Usvojen je i prijedlog programa rada Udruženja industrije tekstila, kože i obuće, a podržana je i inicijativa da se zajedno radi na omasovljenju članstva u Udruženju i aktivnijem zajedničkom djelovanju na rješavanju zajedničkih problema s kojima se ove industrijske grane susreću.

Edina Kurtić, sekretar Udruženja
industrije tekstila, kože i obuće

Seminar u Komori...

Energetska efikasnost, lasersko skeniranje, dizajn i razvoj proizvoda

Održan seminar za profesore građevinsko-geodetske struke



Profesori građevinsko – geodetske struke u srednjim školama sa područja Tuzlanskog kantona učestvovali su na tradicionalnom seminaru u organizaciji Pedagoškog zavoda Tuzlanskog kantona.

Energetska efikasnost, lasersko skeniranje, dizajn i razvoj proizvoda samo su neke od tema seminara održanog u Kantonalnoj privrednoj komori Tuzla. Pored stručnih tema, razgovaralo se i o mentalnom zdravlju. Prilikom predstavi ovu temu imala je Emira Hamidović, diplomirani pedagog i psiholog. Istaknuto je da su profesori često stavljeni po strani kada je u pitanju mentalno zdravlje i da bi prije svega oni trebali biti mentalno sposobni kako bi u učenicima pomogli.

Od početka realizacije seminara, još od 2010. godine podršku pri realizaciji pruža i Pedagoški zavod Tuzlanskog kantona. Zlatko Ibrišimović, savjetnik za srednje stručno obrazovanje, smatra da nova znanja i vještine koje se usvoje na ovakvim seminarima itekako doprinose kvalitetu u radu nastavnika. Na području Tuzlanskog kantona je u toku zimskog raspusta, dok su učenici odmarali, oko 50 profesora uzelo je učešće na seminaru građevinsko-geodetske struke na području Tuzlanskog kantona. Svoja znanja će prenositi na buduće mlade generacije, a prema riječima direktora Kadrije Ibiševića, Građevinsko-geodetska škola Tuzla broji značajan porast broja učenika.



Zakon, usvojen u oba doma Parlamenta...

Zakon o kontroli duhana u FBiH stupa na snagu 20. maja

Federalno ministarstvo zdravstva bi do početka primjene zakona trebalo pripremiti određene podzakonske akte i pravilnike kojim bi definirali na koji način će se vršiti njegova implementacija



Zakon o kontroli i ograničenoj upotrebi duhana, duhanskih i ostalih proizvoda za pušenje u Federaciji Bosne i Hercegovine trebalo bi da se počne primjenjivati od 20. maja.

Zakonom se, između ostalog, uređuju mjere za zabranu i ograničenje upotrebe duhana, duhanskih i ostalih proizvoda za pušenje, zabranu njihovog oglašavanja, promocije i sponzorisavanja, sprječavanje pristupa maloljetnim osobama tim proizvodima, sastav duhanskih i ostalih proizvoda za pušenje te obavezne oznake na pakovanjima.

Zastupnica u Parlamentu Federacije Bosne i Hercegovine Kenela Zuko, koja je inicirala Zakon, usvojen u oba doma Parlamenta prošle godine, kazala je Feni da bi Federalno ministarstvo zdravstva do početka primjene zakona trebalo pripremiti određene podzakonske akte i pravilnike kojim bi definirali na koji način će se vršiti njegova implementacija.

Zuko kaže da je problematizirala zabranu pušenja prvenstveno jer maloljetne osobe mogu konzumirati nargile, dok nadležna inspekcija nema mogućnost kažnjavanja vlasnika takvih barova.

„Akcente sam stavila na maloljetnu djecu i nargila barove. Ali mnogi i su to, uz pomoć duhanske industrije, predstavili kao zabranu pušenja“, kazala je Zuko.

Ističe da je Predstavnički dom Parlamenta FBiH hitno usvojiti zakon koji ima smisla i koji brine o građanima, posebno onima koji ne konzumiraju cigarete, ali da se sve to izmijenilo amandmanima.

Iz Federalnog ministarstva zdravstva kazali su za Fenu da je Zakonom propisana i obaveza donošenja podzakonskih propisa te da su u pripremi pravilnik o uvjetima za posebne

prostorije za pušenje u smislu izuzetaka od zabrane pušenja i pravilnik o obliku i sadržaju oznaka o zabrani prodaje i zabrani pušenja maloljetnim osobama.

Napominju da se rokovi određuju različito spram djelatnosti. **„Tako je, na primjer, propisano da obaveze za fizičke subjekte nastupaju sa danom početka primjene ovog zakona, 20. maj“**, istakli su.

Ističu da pravni subjekti, u čijim objektima postoje izuzeća od zabrane pušenja, kao što su odjeli za zaštitu mentalnog zdravlja u zdravstvenim ustanovama, ugostiteljski objekti i drugi objekti, bilo da su u njihovom vlasništvu ili su im dati na korištenje, trebaju uskladiti rad s odredbama tog zakona u roku od šest mjeseci od dana stupanja na snagu pravilnika o uvjetima za posebne prostorije za pušenje u smislu izuzetaka od zabrane pušenja.





44. sajam turizma u Beogradu...

“Privreda TK” u Beogradu

Značajan sajamski nastup firmi članica Komore



“Kad je odmor nije teško” slogan je 44. međunarodnog sajma turizma koji je održan u Beogradu u okviru Beogradskog sajma. Među izlagačima iz 33 zemlje, bila je i zajednička postavka Kantonalne privredne komore Tuzla pod nazivom “Privreda TK”. Ceremoniji otvaranja Sajma, prisustvovali su Aleksandar Šapić gradonačelnik Beograda, Aleksandar Vučić predsjednik Srbije koji je otvorio Sajam te Čen Bo ambasadorica Kine koja je zemlja partner ovogodišnjeg Sajma turizma. “Tokom posljednjih godina napravljeni su veliki pomaci kada je turizam u pitanju, ali i dalje postoje stvari koje mogu da budu značajno unaprijeđene. Vrijedno je pomenuti da je prihod od turizma porastao na dvije i po milijarde evra”, rekao je Vučić. Na Međunarodnom sajmu turizma i Međunarodnom sajmu hotelsko-ugostiteljske opreme Horeka – Oprema, učestvovalo je oko 350 izlagača iz 33 države, među kojima je i osam novih država sa afričkog kontinenta.



Posjetioce sajma je i ove godine u halama 1, 1A i 4 Beogradskog sajma dočekala raznovrsna turistička ponuda i veliki broj popularnih svjetskih destinacija. Na srbijanskom tržištu najomiljenije su destinacije Turska, Grčka, Crna Gora, Tunis, Bugarska, Hrvatska, Cipar, Slovenija, Bosna i Hercegovina te otočke destinacije Maldivi, Sao Tome & Principe. Na sajmu su učestvovali najznačajnije turističke agencije, hoteli, turistički centri, transportne kompanije, međunarodni turistički operatori. Direktorica Beogradskog sajma Danka Selić saopštila je da je ove godine Sajam turizma i Sajam HORECA-OPREMA obišlo oko 40 hiljada aktera, izlagača, predstavnika NR Kine – zemlje partnera sajma, gostiju i posjetilaca. Broj realizovanih B2B sastanaka i broj buyera, ocjenjeni su kao najuspješniji posljednjih 10-tak godina. Manifestaciju je pratilo oko 1000 akreditovanih novinara iz dvadesetak zemalja. Tokom Sajma turizma organizovano je više od 500 B2B sastanaka.

Bosnu i Hercegovinu su ove godine predstavljale kantonalne, gradske i općinske turističke zajednice iz Federacije BiH, Turistička organizacija RS, Nacionalni park “Una” Bihać i Kantonalna privredna komora Tuzla.

Zajedničku izložbenu postavku pod nazivom “Privreda TK” sačinjavali su ove godine Turistička zajednica Grada Tuzla, hotel “Vertigos” Tuzla, TA “Golden Tours” Tuzla, TA “Transturist” Tuzla, hotel “Tehnograd” Tuzla, restoran “Bardak” Živinice, restoran “Mama Mia Origins” Tuzla, JKP “Pannonica” Tuzla, “Old Story Pub” Tuzla, “Limenka” gradska čevabdžinica Tuzla, pizzeria “Barok” Tuzla, “Palačinkara kod Bagija” Tuzla, mjenjačnica “Emma” Tuzla, “Piemonte” dd Tuzla, “Muška voda” Kladanj, Hotel “Terme Ozren” Bosansko Petrovo Selo, hotel “Vidikovac” Divič, Lukavački sajam, “Grapos” Gračanica, “Hashtag Autor” Tuzla sve firme članice Komore koje su na zajedničkom štandu u Hali četiri Beogradskog sajma pripremile bogatu ponudu za posjetioce. Nastup navedenih firmi, predstavnika privrede TK i BiH, na najvećoj turističkoj manifestaciji u regionu organizovala je Kantonalna privredna komora Tuzla.

Pripremio: Dino Kalesić



Najava sajamskih manifestacija...

Gračanica: Grapos Expo od 16. do 19. maja

Međunarodni sajam poduzetništva i obrta



Međunarodni sajam poduzetništva i obrta “Grapos Expo” Gračanica je sajam poduzetništva i obrta širokog spektra, međunarodnog karaktera i razvojno-edukativnog usmjerenja. Sajam se profilira se kao sajam dostignuća proizvodnog i uslužnog poduzetništva i obrta, starih i umjetničkih zanata te kvalitetnih uvjeta iz okruženja koji doprinose razvoju poduzetništva i obrta. GRAPOS EXPO nastavlja rasti i uvrštava se na ljestvicu najvećih najznačajnijih sajmova u regionu. Prvi sajam održan je 2010 godine u Gračanici i od tada svake godine pravi iskorak u svim segmentima od broja izlagača, prostora, te samih posjetilaca. Sajam se i ove godine održava na prostoru poslovne zone “Fering” od 16. do 19. maja na preko 10.000m² izložbenog prostora. Sajam predstavlja privrednu aktivnost malog i srednjeg poduzetništva i svih drugih aktera razvoja poduzetničke klime te privrednog i ekonomskog razvoja opštine Gračanica, Tuzlanskog kantona i cijele BiH.

Budite dio priče koja se piše u Gračanici jer, budućnost se ne očekuje, ona se gradi!

Prijava na: <https://kpktz.ba/index.php/vijesti/2082-gracanica-grapos-expo-od-16-do-19-maja>

Modriča: “12. sajam privrede”, 7-8 septembra



Jedna od najvažnijih privrednih manifestacija nap odručju opštine Modriča, “12. sajam privrede” biće održan 7. i 8. septembra 2023. godine na lokaciji Kulturno-sportskog centra u Modriči (sportska dvorana). Pored privrednih subjekata, na Sajmu će se predstaviti i izlagači iz oblasti turizma i poljoprivrede. Tokom sajma je planirano održavanje raznih konferencija i razgovora privrednika o aktuelnim tematskim sadržajima iz oblasti proizvodnje i usluga. Svrha Sajma je da stvara i promovise poduzetnički duh, poveže privredne subjekte sa različitim područja, te poveća konkurentnost privrednog sektora i privredni

razvoj. Sajam će okupiti brojne finansijske institucije, nevladine organizacije i razvojne agencije koje pružaju podršku razvoju malog i srednje preduzetništva, uz medijsku promociju. Organizatori sajma Opština Modriča i Razvojna agencija opštine Modriča pozivaju sve zainteresovane da na vrijeme rezervišu izložbeni prostor za predstavljanje svojih proizvoda i usluga i ostvare nove poslovne kontakte i ugovore. Sve dodatne informacije na www.raomd.org, mail: sajam.modrica@gmail.com i oarmsp@gmail.com, telefon sa brojevima: 053/814-065 i 053/811-372.

Bihać: 20. sajam “Ekobis”, 7-10.9.



Privredna komora USK organizira 20. Međunarodni sajam ekologije – EKOBIS 2023, koji će se održati u Bihaću od 7. do 10.9.2023. godine.

Više od desetljeća sajam EKOBIS je najpoznatija i najposjećenija privredna i ekološka manifestacija u široj regiji. Ovaj status EKOBIS održava kreiranjem pozitivnog poslovnog ambijenta, kroz visoke usluge poslovnog umrežavanja izlagača i posjetitelja, ali i organizacijom svih drugih sadržaja i poslovnih događanja prilagođenih potrebama i željama izlagača. U proteklih 19 godina na ovom sajmu se predstavilo više od 3.700 izlagača iz 18 zemalja, a sajam je posjetilo preko 250.000 posjetitelja. Ovim brojkama svakako treba dodati i preko 670 uspješno realiziranih pratećih sadržaja. Osim toga, sva sajamski događanja prate najznačajnije medijske

kuće u regiji. Sve ovo su dobri argumenti da Vas pozovemo da na vrijeme rezervirate Vaš izložbeni prostor, ali i da prijavite aktivnosti vezane za prateće sadržaje (promocije, prezentacije, degustacije, okrugle stolove i ostale sadržaje).

Pratite sve aktivnosti vezane za organizaciju sajma na stranici Privredne komore USK - <https://www.pkusk.com/ekobis>

D.K.



Najava sajamskih manifestacija

Beograd: 47. SEEBBE, 24-27.4.



Međunarodni sajam građevinarstva

Najveći sajam iz oblasti građevinarstva u regionu jugoistočne Evrope, 47. Međunarodni sajam građevinarstva SEEBBE biće održan od 24. do 27. aprila 2023. godine. Izlagački program obuhvata sve segmente građevinske delatnosti: istraživanje i projektovanje, izgradnja i održavanje objekata, visokogradnja, niskogradnja, najsavremeniji materijali, građevinske mašine, uređaji i alati, informacione tehnologije, najsavremenije sisteme gradnje, opremanje objekata i enterijera. Nove investicije u regionu kao i lansiranje tehnoloških inovacija, naročito vezanih za održivu izgradnju, energetske efikasnosti i efikasnost korišćenja resursa, uticaj na okolinu i zdravlje ljudi, materijali i procesi budućnosti privlače veliki broj posetilaca zainteresovanih za komercijalnu i stambenu izgradnju i unutrašnje radove kako za novogradnju, tako i za renoviranje i modernizaciju.

Pet razloga za izlaganje na sajmu SEEBBE: **1.** Ostvarite nove kontakte **2.** Predstavite svoje proizvode i inovacije **3.** Osvojite nova tržišta **4.** Ostvarite cilj **5.** Nadite inspiraciju za nove projekte hala i otvoreni prostor

ORGANIZATOR: BEOGRADSKI SAJAM - PROJEKTI TIM SAJMA GRAĐEVINARSTVA – SEEBBE

Zagreb: Sajam “Grand Expo”, 22-27. maja

Predstavljaju se samo najbolji, budite jedan od njih!



Misija Međunarodnog industrijskog proljetnog sajma GRAND EXPO je promocija gospodarstva i poduzetništva iz tematskih oblasti te pružanje doprinosa tvrtkama i organizacijama - sudionicima Sajma - u pozicioniranju na međunarodnom tržištu. Promocija razvoja održive industrije, internacionalizacije poslovanja i pametnog investiranja, predstavlja lajt motiv organiziranja MIPS GRAND EXPO. Uz prethodno, misija MIPS GRAND EXPO u 2022./2023. godini je i iskazivanje potpore građanima i gospodarstvenicima Ukrajine kroz posebnu osmišljenu promociju ekonomije i gospodarstva Ukrajine. Veliki naponi MIPS GRAND EXPO usmjereni su na cilj da se GRAND EXPO pozicionira kao značajna platforma za prezentiranje potreba i poslovnih mogućnosti graditeljskog, energetskog, drvno, metalnog i drugih sektora iz tematskih oblasti. Međunarodni industrijski proljetni sajam GRAND EXPO je, u konačnici, skup programa, aktivnosti, akcija, sadržaja i doživljaja koji, kada se profesionalno i sinergijski organiziraju u jednu cjelinu, daju koristan i interesantan „živ“ proizvod i za raznoliku strukturu posjetitelja.

Više informacija na web stranici Sajma:
<https://www.promo-perspektive.com/grand-expo>

Zagreb: 50. jubilara “Ambienta”, 25.9. - 1.10.

Međunarodni sajam namještaja, unutarjeg uređenja i prateće industrije



Međunarodni sajam namještaja, unutarjeg uređenja i prateće industrije Ambienta je nacionalni središnjeg poslovni događaj drvno-prerađivačke industrije i proizvodnje. S tematskim cjelinama Namještaj i unutarne uređenje te industrijski program, Design zona, programom zaokružuje priču o unutarjem uređenju, dizajnu i pratećoj industriji. Zagrebački velesajam će 50. jubilaru “Ambientu” organizovati od 25.9. do 1.10.2023. godine. Sajam je izvanredna prilika za promociju proizvoda i usluga iz oblasti namještaja za uređenje doma, uredskog namještaja, namještaja za opremanje hotela i apartmana, unutarjeg uređenja (zidne obloge, rasvjeta, tepisi, zavjese, dekor), strojeva i alata te reprodromaterijala za drvnu industriju i proizvodnju namještaja. Pored izlagačkog segmenta uz predstavljanje noviteta i inovacija u pripremi je tematski cjelovit stručni i edukacijski program u cilju predstavljanja novih tržišnih i tehnoloških kretanja kako u proizvodnji namještaja i drvnoj industriji tako i u području graditeljstva. Kantonalna privredna komora Tuzla će i ove godine biti sastavni dio ove značajne sajamske manifestacije. Kantonalna privredna komora Tuzla poziva sve firme iz oblasti drvoprerađivačke industrije na području Bosne i Hercegovine da se odluče za učešće na velikom i značajnom sajmu u Zagrebu. Za kataloško predstavljanje djelatnosti Komore na Ambientu 2023, Zagrebački velesajam osigurati će zajednički izložbeni prostor. Poslovnim posjetiteljima koji će sajam posjetiti u organizaciji Komore, Zagrebački velesajam osigurati će b2b susrete u terminu po dogovoru. Za sve firme koje odluče izlagati na Sajmu a posredstvom Kantonalne privredne komore Tuzla, menadžment Zagrebačkog velesajma i sajma “Ambienta”, će i ove godine odobriti i posebne finansijske uslove. Nadamo se velikom odzivu firmi iz drvoprerađivačke oblasti i industrije namještaja, članica Komore, firmi sa područja Tuzlanskog kantona te cijele Bosne i Hercegovine a sve u cilju uspješnog nastupa Kantonalne privredne komore Tuzla s izlagačima na ovogodišnjoj Ambientu. Za prijave i sve potrebne informacije te dogovore o posebnim uslovima nastupa, kontakt osoba: Dino Kalesić, 061/164-311, 035/369-562, dino@kpktz.ba.

D.K.



Sajmovi jadranskog sajma...

48. Sajam hrane i Sajam turizma

Budva od 29.3. do 1.4.2023. godine



Ova tradicionalna izložba prehrambene industrije, poljoprivrede i pratećih industrija u kontinuitetu pruža izlagačima poslovnu platformu za plasman i promociju proizvoda i usluga. Prepoznatljiva je po promotivnim i komercijalnim rezultatima izlagača iz oblasti: poljoprivredne proizvodnje, prehrambene industrije, mediteranskih kultura, alkoholnih i bezalkoholnih pića, prerade ribe, industrije kafe, maslinovog ulja, pčelarstva i medarstva, organske hrane i konditorske industrije, od kojih se značajan broj upravo na Sajmu hrane po prvi put uspješno predstavio tržištu.

Najstarija manifestacija u organizaciji Jadranskog sajma, obnovljena od strane Globalne sajamske asocijacije kao Ufi Approved Event, u kontinuitetu doprinosi uspostavljanju jakih i dinamičnih privrednih veza i aktivnosti između poslovnih subjekata i institucionalnih partnera na međunarodnom nivou.

Povezujući strateške privredne grane poljoprivredu i turizam, pružamo Vam mogućnost da u konkurentskoj atmosferi istaknete kvalitet Vaših proizvoda i unaprijedite poslovne rezultate. Paralelno sa Sajmom hrane organizovaće se Sajam turizma što predstavlja priliku izlagačima da iskoriste benefite sinergije sajamskih platformi. Tradicionalno prisustvo brojne publike predstavnika turističke privrede, medija i profesionalnih kupaca iz Crne Gore i regiona, uoči ljetnje turističke sezone, pruža mogućnost da na efikasan način, u kratkom vremenu ostvarite značajne komercijalne efekte.

45. Sajam namještaja, opreme za domaćinstva, poslovne prostore i unutrašnju dekoraciju

Budva od 29.3. do 1.4.2023. godine

Jadranski sajam već pola vijeka je mjesto okupljanja i promocije svih značajnih proizvođača namještaja iz Crne Gore i regiona, na kome izlagači predstavljaju svoje najnovije proizvode, kolekcije i trendove u dizajniranju namještaja, mjesto gdje se razmjenjuju informacije i ideje, njeguju postojeći poslovni kontakti i ostvaruju novi. Termin održavanja Sajma namještaja tradicionalno je vezan za pripremu turističke sezone, posebno za dio koji se odnosi na opremanje ugostiteljskih i smještajnih kapaciteta, što će izlagačima donijeti veću potražnju za njihovim proizvodnim programom, a samim tim i dobre poslovne rezultate. Sajam namještaja je međunarodnog karaktera, jedini nacionalni sajam u Crnoj Gori i najveći poslovni događaj u drvnoj industriji i industriji namještaja. Prisustvo kompanija i proizvođača iz inostranstva, kolektivni nastupi u organizaciji regionalnih i državnih privrednih komora te strukovnih udruženja i agencija, dodatno afirmišu međunarodni karakter Sajma.

Blagovremenim prijavljivanjem imate mogućnost da iskoristite paletu popusta koje nudi AD Jadranski sajam. Jadranski sajam, kao tržišna institucija sa snažnim promotivnim i prodajnim efektima, te kao pružalac usluga u sajamskoj industriji i dalje u novim uslovima ostaje pouzdan partner privredi i društvenoj zajednici. Upravo na toj liniji Jadranski sajam i stoji na raspolaganju za Vaše inicijative, predloge i ideje u okviru planiranih sajmova u 2023 godini, i mogućih novih projekata koje vidite kao potrebne.

Za dodatne informacije kontaktirajte nas na telefone: +382 33 410 400 ili na e-mail: sajam@jadranskisajam.co.me

Očekujući Vašu prijavu za učešće želimo Vam puno uspjeha i srdačno Vas pozdravljamo.

D.K.



Iz firmi članica Komore...

Lukavac cement: Redovni godišnji remont do 5.4.



U Lukavac Cementu je sredinom februara pokrenut redovni remont postrojenja. Zaustavljen je rad peći za proizvodnju klinkera i sve do 5. aprila 2023. Godine odvijat će se brojne aktivnosti kako bi fabrika i u narednom periodu mogla raditi u punom kapacitetu.

„Remont naših postrojenja je vrlo važan postupak koji se planski obavlja uz učešće naših inženjera, uposlenika i specijalističkih kompanija iz zemlje i inostranstva. Nakon uspjeha iz prošle godine kada smo postigli rekordnu proizvodnju klinkera, sada je vrijeme da se postrojenja detaljno pregledaju, uklone eventualni nedostaci, optimiziraju procesi i sve bude spremno za proizvodnju klinkera i cementa teponovno postizanje dobrih rezultata“, istakao je Nedim Pašić, tehnički direktor Lukavac Cementa. Jedan od ciljeva remonta je svakako dalje povećanje udjela alternativnih goriva u proizvodnom procesu, te smanjenje upotrebe fosilnih goriva i povećanje energetske efikasnosti. Iskorištavanjem svih potencijala energetske efikasnosti i radeći na principima održivosti, Lukavac Cement i na ovaj način ide putem nisko-karbonskog razvoja, što direktno utiče na očuvanje prirodnih resursa i zaštitu okoliša.

U Lukavac cementu održana praktična edukacija za buduće EUREM menadžere

U saradnji sa Predstavništvom njemačke privrede u BiH (AHK BiH), u Lukavac Cementu održana je cjelodnevna praktična nastava za buduće EUREM menadžere. Generalni direktor Lukavac Cementa Stjepan Kumrić u svom uvodnom izlaganju je istakao da je to rezultat dugodišnje uspješne saradnje sa AHK BiH i da su među prvim polaznicima EUREM programa obuke za sticanje međunarodno priznatog certifikata za „Evropskog Energetskog Menadžera“ bili upravo inženjeri Lukavac Cementa. Ovaj njemački program se od 1994. godine provodi u više od 30 zemalja u svijetu i u proteklom periodu je dokazao svoju efikasnost. Menadžer za energiju, okoliš i razvoj u Lukavac Cementu Emir Čilimković, koji je i sam certificirani energetski menadžer, održao je stručno predavanje o poboljšanju energetske efikasnosti linije za proizvodnju klinkera sušenjem alternativnog goriva, a njegov završni rad u sklopu ove edukacije 2019. godine proglašen je najuspješnijim. Tokom predavanja je naglasio da je glavna uloga energetskog menadžera sistemizacija podataka o potrošnji različitih oblika energije, te kreiranje plana i programa mjera poboljšanja energetske efikasnosti prema prioritetima. Polaznici edukacije su, između ostalog, imali priliku postavljati pitanja i razgovarati ne samo o ovoj temi, nego i o iskustvima i koristima ovog rješenja za Lukavac Cement, kao i o svim prednostima i značaju upotrebe alternativnih goriva u cementnoj industriji, uštedama fosilnih goriva i energije, energetske efikasnosti i zaštiti okoliša. Obuka je završena obilaskom proizvodnih pogona fabrike. Predstavništvo njemačke privrede u BiH je licencirani partner za realizaciju EUREM edukacijskog programa u BiH, a Midheta Jeina, projekt menadžerica AHK BiH, je kazala: „Posebno smo ponosni na činjenicu da je današnji predavač nekadašnji učesnik, te se nadamo da će i učesnici iz generacije 2022 biti predavači budućim generacijama“. Održana praktična edukacija u Lukavac Cementu pokazala je svu važnost razmjene stručnih znanja i primjene energetskih isplativih rješenja u praksi, što u konačnici konituirano osigurava razvoj uposlenika i kompanije.

Yavuz Company: Smanjen rok izrade i isporuke



YAVUZ COMPANY d.o.o. je firma koja uspješno posluje od 2005. godine i od tada iza sebe posjeduje veliki broj uspješno realizovanih projekata. Naša firma se bavi proizvodnjom i montažom PVC i ALU stolarije. Vodeći računa da naši kupaci budu zadovoljni, stalno uvodimo novine u proizvodnju i stručno osposobljavamo radnike, da što brže i kvalitetnije ispune očekivanja naših kupaca. Kontinuirano osluškivanje potreba kupaca i osposobljavanje kadrova rezultiralo je da zadovoljimo i odgovorimo na najčešći upit građana, a koji se odnosi na rok isporuke. S ponosom ističemo napredak da smo rok izrade i isporuke smanjili sa 45 dana na 21 dan.

**Nazovite 081 920 011 i uvjerite se.
Vaš Yavuz Company d.o.o.**



GiKiL: Na snazi novi pojedinačni kolektivni ugovor

Global Ispat Koksna Industrija d.o.o. Lukavac



Uprava i Sindikalna organizacija kompanije Global Ispat Koksna Industrija d.o.o. Lukavac su potpisali novi pojedinačni kolektivni ugovor. Nakon uspješnih pregovora, te nakon što su obezbijedili potrebni uslovi, dokument je i zvanično potpisan. Pored povećanja plata, novi ugovor za radnike i za kompaniju donosi poboljšanje sveopćih uslova rada, te predstavlja garanciju konstruktivnog i socijalnog dijaloga. Ugovor je potpisan ne period od dvije godine. „Ovo je još jedna potvrda da je dobra saradnja na svim poljima moguća, naročito kada su u pitanju radničke potrebe i radnička prava. Dijalog se nastavlja, pravimo velike planove, ostvarujemo zacrtano“, poručuju iz Global Ispat Koksna Industrija d.o.o. Lukavac.

GiKiL nagradio „Radnike godine“

Global Ispat Koksna Industrija d.o.o. Lukavac

U skladu sa usvojenom politikom nagrađivanja, najistaknutijim radnicima GIKIL-a su dodijeljena zaslužena priznanja i zahvalnice. Vrijednu titulu „Radnik godine“ za 2022. ponijelo je njih 14. Kako je istakao i generalni direktor kompanije, Dževad Kasumović, dodijeljene titule su nagrade za izuzetan trud, doprinos u radu i posebno zalaganje tokom obavljanja poslovnih zadataka. -Vaš rad je prepoznat i želim da vam čestitam, te ujedno se zahvalim na svemu što radite i činite za našu kompaniju. Izabrani ste od svojih sredina, što najbolje govori da vas vaši nadređeni i vaše kolege zaista cijene. Želim da ostanete uzor svima i da ovim činom podstaknete i sve druge da budu najbolji u onome što rade, a na nama je da kreiramo ambijent koji će to znati i prepoznati i vrednovati, dodao je on.

Radnici, čestitamo i sretno!

Vlada TK sufinansirala projekat nabavke opreme za Hotel „Senad od Bosne“



KM). Prethodno navedeni projekat obuhvata aktivnosti: dizajn stolice, izradu i nabavku istih u cilju unaprijeđenja sigurnosti, funkcionalnosti i udobnosti posjetitelja, te kvalitete boravka u hotelu, kao i nabavka profesionalne perlice za tekuće održavanje. „Izražavam zahvalnost premijeru Tuzlanskog kantona Irfanu Halilagiću, kao i Ministru trgovine, turizma i saobraćaja Mustafi Šakiću za podršku u sufinansiranju projekta „Udobnost i zadovoljstvo za svakog gosta“. Shodno dugotrajnosti poslovnog objekta, njegovom svakodnevnom održavanju, renoviranju, te ulaganju u opremu, menadžment firme je odlučio da nakon 22 godine postojanja, promijeni enterijer objekta (restorana Hotela), na način da se kvalitetnim izborom opreme (stolice), osigura nešto drugačiji, ali svakako kvalitetniji ugođaj za naše goste u objektu. Uzmemo li u obzir da sve ove godine nismo odstupali od klasičnog dizajna, što nas je posebno izdvajalo od objekata u okruženju, osjetili smo potrebu da je poslije 22 godina poslovanja, potreban novi enterijer, koji će biti upotpunjen sa modernom, trendovskom opremom. Za sve ono što smo u proteklom periodu uradili rezultate ćemo imati priliku vidjeti u 2023 godini, s obzirom da smo u završnoj fazi implementacije.“ – istakla je direktorica ugostiteljskog sektora Enida Memić.

Vlada TK, odnosno Ministarstvo trgovine, turizma i saobraćaja TK je sredinom mjeseca juna 2022 godine raspisalo Javni poziv za podnošenje prijava za sufinansiranje razvojnih projekata u Turizmu na području Tuzlanskog kantona za 2022 godinu. S tim u vezi, odobrena su bespovratna novčana sredstva u cilju inoviranja postojećih i razvoja novih atraktivnih sadržaja turističke ponude kao i razvoja turističke infrastrukture kako bi se ojačala konkurentnost turističkog sektora na području TK. Bespovratna sredstva odobrena su za Hotel „Senad od Bosne“, za uređenje i opremanje objekta, odnosno njegovu rekonstrukciju i adaptaciju. Projekat pod nazivom „Udobnost i zadovoljstvo za svakog gosta“, usmjeren ka podizanju kvaliteta turističke infrastrukture u privatnom sektoru, i isti je podržan u iznosu od 41.107,64 KM (ukupna vrijednost projekta: 82.215,28

D.K.



Iz Gradske uprave Tuzla...

Predstavljanje poslovnih ideja učesnika EU projekta

„Partnerski pristup lokalnom razvoju Tuzle“



Predstavljanje poslovnih ideja učesnika projekta „Partnerski pristup lokalnom razvoju Tuzle“, upriličeno je u zgradi „Grafičara“, u sali za sjednice Gradskog vijeća Tuzla. U ovoj fazi projekta, koji realizuje Lokalno partnerstvo za zapošljavanje Tuzla, 10 učesnika je predstavilo svoje poslovne ideje pred Komisijom za ocjenu poslovnih poduhvata i poslovnih planova, a nakon ocjenjivanja za najbolje je obezbjeđena finansijska podrška za početak i razvoj poslovanja u gradu Tuzli. **„Projekt koji danas prezentujemo je veoma značajan, posebno za mlade nezaposlene osobe. Riječ je o projektu koji se realizuje u saradnji sa Međunarodnom organizacijom rada, a koji finansira Evropska unija. Kroz ovaj projekat će biti obuhvaćeno 120 mladih, nezaposlenih osoba, kojima će se kroz više linija podrške pružiti prilika da dođu do zaposlenja. Prva linija podrške odnosi se na to da 60 mladih osoba dobije priliku za prekvalifikaciju i stručno usavršavanje**

za poznatog poslodavca. Druga linija podrška jeste da 60 mladih nezaposlenih osoba dobije priliku za razvoj poduzetničkih ideja. Danas svjedočimo drugom krugu ovog procesa, kada se prezentuju dobre poslovne ideje, pretočene u dobre poslovne planove. Pod mentorstvom stručnih osoba, koje su razvijale metodologiju razvoja ideja u poslovni plan, ukupno su učestvovala 32 osobe. Komisija će danas saslušati prezentaciju razvijenih poslovnih ideja te ih ocijeniti. Oni koji budu najbolji, njih minimalno pet, biti će podržano iz sredstava budžeta ovog projekta, u iznosu do 6.000KM. Za one ideje koje ne budu podržane kroz ovaj projekat, a osobe se odluče registrovati svoju djelatnost, biti će podržane iz budžeta Grada Tuzle kroz naš projekat Siguran start. Grad Tuzla svake godine podržava osobe koje su registrovale svoju djelatnost u toj ili protekloj godini, dakle u prvoj drugoj godini poslovanja, iz budžeta Grada Tuzle i na takav način mi dodatno podržavamo mlade. Podržavamo njihovo poduzetništvo, njihov ostatak u želji da rade ovdje i da imaju budućnost ovdje. Protekle godine Grad je podržao 179 obrta, a od tog broja 84% su bili mladi poduzetnici, što pokazuje opredijeljenost Grada Tuzle da bude partner mladima, da pravi ambijent za ostatak mladih, da pridajemo važnost mladima i da želimo na zajednički način, kroz partnerstvo, graditi kvalitetniju i svijetlu budućnost Tuzle”, - poručio je Zijad Lugavić gradonačelnik Tuzle.

Potpisani ugovori u cilju prekvalifikacije nezaposlenih osoba

„Partnerski pristup lokalnom razvoju Tuzle“ - Lokalno partnerstvo za zapošljavanje Tuzla



Potpisivanje ugovora o dodjeli bespovratnih sredstava za prekvalifikaciju nezaposlenih osoba iz grada Tuzle, u okviru projekta „Partnerski pristup lokalnom razvoju Tuzle“, koji realizuje Lokalno partnerstvo za zapošljavanje Tuzla, upriličeno je u zgradi Gradske uprave. Zijad Lugavić gradonačelnik Tuzle u ime ovog lokalnog partnerstva, potpisao je ugovore sa izabranim kandidatima. **„Prošle godine započeli smo projekat sa Međunarodnom organizacijom rada, koji se finansira iz sredstava Grada Tuzle i Evropske unije, koji je vezan za dvije linije podrške, za 120 nezaposlenih osoba sa područja Tuzle. Prva linija podrške odnosi se na prekvalifikaciju i stručno usavršavanje, a druga na razvoj poduzetničkih ideja. Obzirom da počinje drugi ciklus prekvalifikacije u našim srednjim školama, potpisali smo ugovore sa sedam naših nezaposlenih sugrađana, koji će proći prekvalifikaciju za zanimanje zavarivača i CNC operatera. Nakon**

završetka edukacije i sticanja diplome, oni će boraviti kod naših partnera u ovom projektu, privrednih subjekata, kako bi odradili praktični dio. Nakon toga poslodavci će odabrati najbolje, te im ponuditi radni odnos. Za nas je ovaj projekat veoma bitan, obzirom da se radi o prekvalifikaciji, stručnom usavršavanju za poznatog poslodavca, gdje će sve ove osobe dobiti priliku da sklope ugovor o radnom odnosu sa privrednim subjektima, koji posluju i realizuju svoje aktivnosti na području grada Tuzle. Veoma je bitno, obzirom da smo povezali potrebe realnog sektora i nezaposlene osobe, da smo kroz ovaj program uspjeli osposobiti nezaposlene osobe za potrebe naših privrednih subjekata”, istakao je gradonačelnik



Tuzle dr sc Zijad Lugavić. Lokalno partnerstvo za zapošljavanje Tuzla je jedno od 20 uspostavljenih u zemlji, u okviru projekta “Podrška Evropske unije lokalnim partnerstvima za zapošljavanje – Faza II” (LEP II), kojeg Evropska unija financira s 4 miliona eura, a provodi Međunarodna organizacija rada (MOR). Ovaj projekat ima za cilj da doprinese poboljšanju prilika zapošljavanja u lokalnim zajednicama dajući podršku razvoju lokalnih partnerstava za zapošljavanje kao partnerski uspostavljenih mehanizama za tržište rada koji osiguravaju pristup formalnom zapošljavanju na lokalnom nivou.

„Obrazovanje za održivi razvoj“

U Gradskoj upravi Tuzle upriličen sastanak povodom organizacije 28. Ljetnog Univerziteta Tuzla – LJUT 2023



U prostorijama Grada Tuzle, upriličen je sastanak povodom organizacije 28. Ljetnog Univerziteta Tuzla – LJUT 2023, koji će biti održan u periodu od 29.5. do 1. 7.2023. godine u Tuzli, a čija centralna tema glasi „Obrazovanje za održivi razvoj“. Sastanku su prisustvovali Zijad Lugavić gradonačelnik Grada Tuzle sa saradnicima, te prorektorica za međunarodnu i međuuniverzitetsku saradnju Univerziteta u Tuzli i vanredni profesor, dr sci. Vesna Bratovčić sa saradnicima. Ljetni Univerzitet Tuzla je manifestacija međunarodnog karaktera, koja okuplja veliki broj posjetilaca i učesnika iz inostranstva. U okviru ovogodišnjeg LJUT-a su predviđeni brojni sadržaji koji će studentima, zaposlenicima i široj društvenoj zajednici omogućiti sticanje novih znanja i vještina, međusobno povezivanje i umrežavanje, promociju naučno- istraživačkog rada, uključujući i mnoge sportske, zabavne i kulturno-umjetničke aktivnosti i događaje. Pored drugih aktivnosti, ove godine će u okviru Ljetnog Univerziteta Tuzla – LJUT 2023 biti, po prvi put, organizovan „Sajam karijere“, događaj koji će na jednom mjestu okupiti i povezati akademsku zajednicu i poslodavce iz različitih oblasti, i koji će biti otvoren za sve zainteresovane građane. Zijad Lugavić gradonačelnik Grada Tuzle pohvalio je inicijativu Univerziteta u Tuzli i sve uključene u organizaciju ovogodišnjeg Ljetnog Univerziteta Tuzla – LJUT 2023, posebno dio koji se odnosi na Sajam karijere, jer će se time mladima i poslodavcima pružiti mogućnost povezivanja, te je obećao da će se Grad Tuzla uključiti kao suorganizator i u skladu sa svojim mogućnostima, pružiti potrebnu tehničku i administrativnu podršku, posebno u segmentima koji se odnose na korištenje javnog prostora u gradu Tuzli za potrebe ove manifestacije. Predstavnici Univerziteta u Tuzli zahvalili su vršiocu dužnosti gradonačelnika Grada Tuzle i njegovim saradnicima na razgovoru i pruženoj podršci u ostvarivanju vizije i ciljeva ovogodišnjeg Ljetnog Univerziteta Tuzla – LJUT 2023.

Saradnja Grada i AmCham BiH

Dogovorena ekonomska i humanitarna saradnja između Grada Tuzle i Američke trgovačke komore u BiH



Zijad Lugavić gradonačelnik Tuzle, održao je sastanak sa generalnim sekretarom Američke trgovačke komore u Bosni i Hercegovini – AmCham BiH, Nedimom Hamzićem i predstavnicima Udruženja Srce za djecu oboljelu od raka, direktorom Fikretom Kubatom i koordinatoricom za saradnju sa UKC Tuzla, Atifom Buldić Bešić. Povod za sastanak je bilo upoznavanje sa aktivnostima koje AmCham BiH i Srce za djecu oboljelu od raka provode na prikupljanju finansijskih sredstava za nabavku ultrazvučnog aparata za djecu sa pratećim sondama, koji bi zadovoljio potrebe hospitalizirane djece

na Odjeljenju za hematologiju i onkologiju Klinike za dječije bolesti UKC Tuzla. Vršilac dužnosti gradonačelnika, Lugavić je upoznao predstavnike ove dvije organizacije da Grad Tuzla vodi socijalno osjetljivu politiku, te da kontinuirano podržava ovakve i slične aktivnosti, posebno one koje su usmjerene ka bolesnoj djeci, njihovim porodicama i liječnicima. „Hvala vam na ovoj humanoj misiji, svjesni smo potreba za nabavkom dodatne i bolje opreme, kako bi naši veoma stručni liječnici mogli u još većem kapacitetu pružiti neophodnu uslugu hospitaliziranoj, teško oboljeloj djeci na Klinici za dječije bolesti UKC Tuzla i Grad Tuzla će se, u skladu sa mogućnostima, priključiti ovoj humanoj akciji“, izjavio je Lugavić. U drugom dijelu sastanka je razgovarano o unapređenju saradnje između Američke trgovačke komore i Grada Tuzle, u cilju razvijanja privredne saradnje, te pružanja podrške u oblasti unapređenja poslovanja, kako za postojeće privredne subjekte u Tuzli, tako i za uposlenike Grada Tuzle koji rade na poslovima ekonomskog razvoja i razvoja informacionih sistema, odnosno digitalizacije javne uprave i cyber sigurnosti. Dogovoreno je da će se na narednom sastanku razgovarati o konkretnim vidovima saradnje, koji će biti definisani sporazumom o saradnji.

D.K.



Iz Vlade TK...

Poboljšanje kvaliteta zraka u TK

Projekat od 50 miliona dolara - Projekat se sastoji od tri suštinske komponente uz komponentu za upravljanje projektom, a biće podržan kreditnim sredstvima Međunarodne banke za obnovu i razvoj



Preliminarna procjena potencijalne realizacija projekta poboljšanja kvaliteta zraka (Air Quality Improvement Project - AQIP) bila je tema sastanka delegacija Vlade Tuzlanskog kantona i Svjetske banke. Projektni razvojni cilj je smanjenje emisija zagađivača zraka i stakleničkih plinova iz sektora grijanja stambenih objekata i sektora transporta kroz poboljšanja u upravljanju kvalitetom zraka i investicije u odabranim kantonima Federacije Bosne i Hercegovine. Kako je rečeno, projekat se sastoji od tri suštinske komponente uz komponentu za upravljanje projektom, a biće podržan kreditnim sredstvima Međunarodne banke za obnovu i razvoj (EBRD) u iznosu od 50 miliona američkih dolara. Uloga kantona u realizaciji ovog projekta bi primarno bila vezana uz dio projekata koji bi podrazumijevao finansiranje djelomičnih grantova za ulaganja u održivo grijanje (npr. zamjena zagađujućih i neefikasnih peći i kotlova na ogrjevno drvo i ugalj modernim rješenjima za grijanje) i energetske efikasnosti (npr. zamjena prozora i vrata, izolacija zidova) u stambenom sektoru, uz fokus na kuće koje se za grijanje oslanjaju na čvrsta goriva, kao najveći izvor emisija PM 2,5. Premijer Halilagić se prije svega Svjetskoj banci zahvalio što je Tuzlanski kanton prepoznala kao područje na kojem je u ovom smislu potrebno djelovati, te podsjetio da Tuzlanski kanton iz vlastitih već realizira projekte energetske efikasnosti, a koji su upravo usmjereni u pravcu zamjene postojećih peći na čvrsto gorivo i toplinsku izolaciju u privatnim stambenim objektima.

“Mi svake godine, putem Ministarstva prostornog uređenja i zaštite okolice realiziramo program podrške našim građanima da uvedu ekološki prihvatljive modele zagrijavanja, te toplinsku izolaciju svojih stambenih prostora. Za te namjene do sada smo već izdvojili više miliona KM i realizacija ovih aktivnosti nama u Tuzlanskom kantonu je itekako poznata. S druge strane već smo u saradnji sa Razvojnim programom UN-a u BiH (UNDP) inicirali i radimo na razradi projekta povećanja energetske efikasnosti na 200 javnih objekata u Tuzlanskom kantonu, što je generacijski projekat kojeg je pokrenula ova Vlada Tuzlanskog kantona. Svjesni značaja ulaganja u ekologiju i zaštitu životne sredine i danas predloženi projekat Vlada Tuzlanskog kantona će pomno razmotriti i odgovoriti mu u skladu sa našim potrebama, potencijalima i kapacitetima”, rekao je na kraju sastanka premijer Halilagić ističući da se očekuje i formiranje nove Kantonalne vlade, pa je politički korektno ostaviti da nova Vlada donese odluku o eventualnom zaduženju Tuzlanskog kantona u ove namjene. U ime Svjetske banke sastanku su prisustvovali voditelj projekta, viši specijalist za energiju Yuri Myroshnychenko, viši specijalista za okoliš Esma Kreso, analitičar operacija Samra Bajramović, specijalista za energiju Claudio Protano, konsultant iz oblasti energije Mustafa Čopelj, konsultant za nabavke Nikola Kerleta i konsultant Ivana Ivičić. Delegaciju Vlade Tuzlanskog kantona su, uz premijera Halilagića činili ministrica prostornog uređenja i zaštite okolice Anela Ajšić, ministar finansija Suad Mustajbašić, sekretar Ministarstva prostornog uređenja i zaštite okolice Emir Softić i savjetnik premijera TK Hasan Fehratović.

Ocjeljenje za informisanje
Vlade Tuzlanskog kantona



Javni poziv za usavršavanje...

Usavršavanje za NO i UO, prijave za novu grupu

Javni poziv za dostavljanje prijava



Kantonalna privredna komora Tuzla u saradnji sa Privrednom/Gospodarskom komorom FBiH, a na osnovu Uredbi Vlade FBiH o usavršavanju predsjednika i članova nadzornih odbora i uprava privrednih društava sa učešćem državnog kapitala (“Službene novine F BiH”, br. 71/09, 33/10, 23/11, 83/11, 2/13, 80/13, 48/15, 60/16, 88/17 i 19/22) te Programa usavršavanja (“Službene novine F BiH”, br. 40/10) objavljuje

Poziv za dostavljanje prijava za usavršavanje kandidata za članove nadzornih odbora i članove uprava privrednih društava sa učešćem državnog kapitala

Usavršavanje će se organizovati u Tuzli, u aprilu/maju 2023. godine (ili po prikupljanju dovoljnog broja kandidata).

Zainteresovani kandidati prijavu mogu izvršiti dostavom prijavnog upitnika (na web stranici Komore: www.kpktz.ba).

Potrebna dokumentacija:

1. Prijavni obrazac
2. Ovjerena kopija diplome
3. Uvjerenje o radnom stažu

Cijena usavršavanja je 880,00 KM, plaćanje se vrši prema uputstvu Privredne/Gospodarske komore FBiH nakon formiranja grupe i određivanja datuma početka usavršavanja.

Prijave se dostavljaju lično ili putem pošte na adresu:

Kantonalna privredna komora Tuzla
Trg slobode bb
75 000 Tuzla
n/r Edina Kurtić

ili


Privredna/Gospodarska komora FBiH
Branislava Đurđeva 10
71 000 Sarajevo
n/r Aida Handžić

Kontakt osoba za dodatne informacije : mr.sc. Edina Kurtić dipl.ecc. tel 035/369-551 ili e-mail: edina@kpktz.ba
Upitnik na: https://kpktz.ba/administrator/index.php?option=com_content&view=article&layout=edit&id=121



PRIVREDNA KRETANJA U TUZLANSKOM KANTONU ZA I-XI 2022. GODINE

Prema podacima za period januar - novembar 2022. godine, došlo je do rasta industrijske proizvodnje u Tuzlanskom kantonu od 1,1% u odnosu na isti period 2021. godine. Rast industrijske proizvodnje je ostvaren u kategorijama intermedijarnih proizvoda 7,5%, kapitalnih proizvoda 6,9% i netrajnih proizvoda za široku potrošnju 1,1%, dok je došlo do pada proizvodnje energije 5,2% i trajnih proizvoda za široku potrošnju 5,5%.




Industrijska proizvodnja I-XI 2022/ I-XI 2021 (%)

Ukupni izvoz iz Tuzlanskog kantona za jedanaest mjeseci 2022. godine iznosio je 2.519,9 miliona KM što je za 34,1% više u odnosu na nominalnu vrijednost izvoza u istom periodu 2021. godine. U istom periodu ostvaren je uvoz u vrijednosti od 2.808,5 miliona KM, što je rast nominalne vrijednosti uvoza od 31,4% u odnosu na isti period prošle godine. Uz procjenu godišnje stope inflacije za ovaj period, koja je iznosila 16,3%, realni rast izvoza iz Tuzlanskog kantona u posmatranom periodu je oko 15,6%, dok je realni rast uvoza oko 13%.

Ostvaren je vanjskotrgovinski deficit od 288,6 miliona KM, a pokrivenost uvoza izvozom je 89,7%. Najveći izvoz je u hemijskoj i metaloprerađivačkoj industriji, a najviše izvoza je otišlo u Rusku Federaciju (557 milion KM), Austriju (436,1 miliona KM) i Njemačku (374,32 miliona KM).

I-XI 2022	Izvoz (000) KM	Uvoz (000) KM
Hrana i piće	63.620	212.744
Industrijski materijali	1.047.547	1.180.279
Goriva i maziva	443.747	534.112
Kapitalni proizvodi	377.423	411.150
Transportna sredstva i dijelovi	147.494	138.031
Proizvodi za široku potrošnju	429.556	325.263



Prema podacima koje objavljuje Porezna uprava Federacije BiH, u periodu januar-novembar 2022. godine, u Tuzlanskom kantonu je naplaćeno javnih prihoda u iznosu od 989.224.363 KM što je 15,15% više u odnosu na isti period 2021. godine. Sa ovim iznosom naplate, Tuzlanski kanton je drugi u učešću u ukupnoj naplati javnih prihoda u Federaciji BiH, odmah nakon Kantona Sarajevo, sa učešćem od 17,11%.

Prema podacima Porezne uprave Federacije BiH, 30.11.2022. godine u Tuzlanskom kantonu je, po prebivalištu zaposlenika, bilo 104.573 zaposlenih.

30.11.2022.	Zaposlenost	Nezaposlenost
UKUPNO	104.573	68.138
Banovići	6.290	3.773
Čelić	1.309	2.115
Doboj-Istok	2.552	1.785
Gračanica	10.903	6.771
Gradačac	9.495	5.838
Kalesija	5.899	5.861
Kladanj	2.104	1.933
Lukavac	11.084	6.811
Sapna	829	1.864
Srebrenik	8.325	6.428
Teočak	688	1.198
Tuzla	32.080	14.206
Živinice	13.015	9.555

Prema podacima Službe za zapošljavanje TK, na kraju novembra 2022. godine, na evidenciji je bilo prijavljeno 68.138 nezaposlenih osoba, od čega 44.792 (65,74%) stručnih i 23.345 (34,26%) nestručnih. U ukupnom broju nezaposlenih je 43.091 žena, od čega je 14.955 nestručnih. U ukupnom broju nestručnih nezaposlenih osoba (23.354), udio nestručnih žena je 64%. Prema starosnoj strukturi, 38.398 (55,54%) nezaposlenih je starije od 40 godina. Najviše nezaposlenih na evidencijama Službe za zapošljavanje je prodavača, ekonomskih tehničara i diplomiranih ekonomista.

Prosječna neto plata u Tuzlanskom kantonu u novembru 2022. je iznosila 1.064 KM što je ispod prosjeka Federacije BiH. U odnosu na kantonalni prosjek iz 2021. godine, neto plaća je veća za 17,4%. Najviše prosječne neto plate su u sektoru proizvodnje i opskrbe el.energijom (1.897 KM), dok su najniže prosječne neto plate u ugostiteljstvu i hotelijerstvu (724 KM).

Djelatnost	Tuzlanski kanton	
	Neto plaća (IX 22)	IX 22/ 2021 %
A Poljoprivreda, šumarstvo i ribolov	932	8,6
B Vađenje ruda i kamena	1.300	20,7
C Prerađivačka industrija	891	24,1
D Proizvodnja i snabdijevanje el.en., plinom	1.897	12,0
E Snabdijevanje vodom i uklanjanje otpadnih voda	1.035	15,5
F Građevinarstvo	792	26,7
G Trgovina na veliko i malo	814	21,9
H Prevoz, skladištenje i komunikacije	795	12,9
I Hotelijerstvo i ugostiteljstvo	724	39,0
J Informacije i komunikacije	1.716	22,0
K Finansijske djelatnosti	1.457	7,4
L Poslovanje nekretninama	941	8,8
M Stručne, naučne i tehničke djelatnosti	1.096	2,2
N Administrativne i pomoćne uslužne djelatnosti	1.021	51,5
O Javna uprava i odbrana	1.505	15,2
P Obrazovanje	1.007	20,0
Q Zdravstvena socijalna zaštita	1.552	4,5
R Umjetnost, zabava i rekreacija	967	17,4
S Ostale uslužne djelatnosti	1.097	8,2

STRUČNA SLUŽBA KOMORE



IN MEMORIAM...

Enes Ružnić

Teška srca Vas obavještavamo da je nakon kratke i teške bolesti u 60-oj godini preminuo predsjednik Privredne komore USK Enes Ružnić.



Enes Ružnić rođen je u Bihacu 1963. godine, gdje je završio osnovnu, srednju i Višu tehničku školu. Nakon toga, kao stipendist VTŠ Bihac, odlazi na nastavak studija u Zagreb. Diplomirao je 1989. godine i odmah nakon toga počinje raditi na VTŠ Bihac u svojstvu asistenta.

U svom radnom vijeku pored VTŠ Bihac radio je na JP RTV Bihac u svojstvu novinara-urednika, na Mašinskom i Tehničkom fakultetu u Bihacu kao asistent-predavač, a od 2005. godine radi u Privrednoj komori USK kao stručni saradnik za industriju. Od 1996. godine, pa do danas, radio je na organizaciji svih značajnijih sajamskih manifestacija na USK, kao koordinator i direktor.

2018. godine izabran je za predsjednika Privredne komore Unsko-sanskog kantona, funkciju koju je obnašao do svoje smrti.

Od 2007. godine, u skladu sa Zakonom o akademskim i stručnim zvanjima i akademskom stupnju ima titulu magistra tehnologije. U svom radnom vijeku bavio se i naučno-istraživačkim radom, te objavio šest znanstvenih radova i jednu knjigu.


Komemoracija i dženaza su održani u ponedjeljak, 27.2.2023. godine. Komemoracija je održana u 11.00 sati u Muzeju Prvog zasjedanja AVNOJA, Bihac, a dženaza u 13.00 na gradskim mezarlicama Humcima, Bihac.

PRIVREDNA KOMORA UNSKO-SANSKOG KANTONA





THE CHAMBER OF ECONOMY OF TUZLA CANTON



TUZLA CANTON

Your Business Partner

